




Tvrtko I Kotromanić

Bosanski kralj (1377. – 1391.)




26. oktobra 1377. godine krunisan je ban Tvrtko I iz dinastije Kotromanića, čime je uspostavljena nezavisna kraljevina Bosna. Prvi put očuvana titula u spomenu novog kralja je u svečanoj povelji napisanoj 10. aprila 1378. godine u Žrnovnici na dubrovačkom području, a potvrđenoj 17. juna iste godine u Trstivnici i ona glasi – Kralj Srbijem u Bosni i Pomorju i Zapadnim stranam.

Tvrtko se krunisao kraljem Bosne u mjestu Mile kod Visokog (današnji Arnautovići), što je krunidbeno mjesto i svih kasnijih bosanskih kraljeva.



Stjepan Tvrtko I Kotromanić bio je bosanski ban od 1353. do 1377. godine, a zatim i prvi bosanski kralj do 1391. godine.

Tvrtko I se smatra jednim od najvećih srednjovjekovnih vladara Bosne, koji je za sobom ostavio zemlju veću, jaču, politički uticajniji i vojno sposobniju od one koju je naslijedio.



Prvi put se u heraldičkom sistemu Kotromanića javlja ljiljan koji od tog vremena zauzima centralnu poziciju na dijademi krune bosanskih kraljeva, grbovima, štitovima i zastavama. Bosanska, katolička i pravoslavna crkva djeluju istovremeno i neometano u okvirima bosanske države.



Kada je Tvrtko I u saradnji sa knezom Lazarom pobijedio kneza Nikolu i ostale srpske velikaše i osvojio dio njihovih teritorija, banu Tvrtku pripao je tada prostor počevši od Tare na Drini, na jugoistoku do Kleka, sve do Prijepolja i manastira Mileševo, čitavo Podrinje i dio Huma.

Stekavši vlast nad srpskim zemljama, Tvrtko se 1377. godine u Milama kod Visokog krunisao za “kralja Srbije, Bosne, Primorija i zapadnih strana”.



Pečat Kralja Tvrtka I Kotromanića

Nakon toga, u ratu s Balšićima, gospodarima Zete, kralj Tvrtko I je osvojio Trebinje, Konavle i župu Dračevicu. Granica na jugoistoku išla je do izvora Pive i Morače, srednjeg toka Zete i na jug do Kotora. Nakon smrti ugarskog kralja, 1382. godine, Tvrtko I uspostavio je vlast nad Kotorom, Splitom, Trogirom i Šibenikom s otocima Bračom i Hvarom.



Istovremeno je osvojio Hrvatsku do Velebita, pa je 1390. godine proširio svoju kraljevsku titulu, kao Stjepan Tvrtko “po milosti Božijoj slavni Kralj Raške, Bosne, Dalmacije, Hrvatske i Primorija”.

Tvrtko I Kotromanić je bio prvi bosanski Kralj. Bosnu je uzdigao na mjesto najjačeg kraljevstva na Balkanu.

Poslije Tvrtkove smrti 1391. godine ponovo nastupa nestabilna politička klima u Bosni, prouzrokovana i opet ugarsko-bizantskim rivalstvom koje po ko zna koji put zavađa bosansko plemstvo. Ovo rezultira čestom promjenom bosanskih kraljeva, a i Ugarska također pokušava iskoristiti priliku u svojim pretenzijama na Bosnu.

